



**ACUILE DAL FRIÛL
MOVIMÊNT PAR L'AUTONOMIE DAL FRIÛL**

**AQUILA DEL FRIULI
MOVIMENTO PER L'AUTONOMIA DEL FRIULI**

**Program gjenerâl pes
Eleziions Regjonâls 2018 in Friûl – V. G.**



ACUILE DAL FRIÛL - MOVIMENT PE AUTONOMIE DAL FRIÛL
AQUILA DEL FRIULI - MOVIMENTO PER L'AUTONOMIA DEL FRIULI

Program gjenerâl dal Moviment Acuile dal Friûl – Aquila del Friuli pes Elezions Regjonâls 2018 in Friûl – V. G.

PREMESSE FONDAMENTÂL

Il Friûl al è une unitât, gjeografiche e storiche, di cuatri identitâts nazionâls, le furlane, le slovene, le todesche e la taliane, e tra chestis lis primis trê a son stadis individuadis de Republiche taliane fra lis minorancis linguistichis cun riferiment al art. 6 de Costituzione e dal art. 3 dal Statût Speciâl.

A ducj i furlans, di cualsisei lenghe a apartegnin, Acuille dal Friûl – Aquila del Friuli e domande une poie, une firme, un vôt, parcè che a lôr e va la sô azion. I furlans a son ducj i citadins residents in Friûl e soredut chei che, di cualsisei lidris a apartegnin, a rispjetin e i vuelin ben a cheste tiere, a fevelin o a imparin a fevelâ lis sôs lenghis, si batin pai dirits dal Friûl e dai siei abitanti.

L'obietf politic gjenerâl di un moviment come Acuille dal Friûl – Aquila del Friuli al è une vere autonomie speciâl pardabon degne di chest non, pal efetif perseguiment des sôs finalitâts linguistichis, culturâls, economicis, sociâls, cun fundament identitari e nazionalitari su la unitât gjeografiche e storiche furlane, soredut te sô conseguente e coerente espression teritoriâl e istituzionâl, e ancje, su un plan diviers e ulterio, linguistiche e identitarie.

CUISTION TERITORIÂL FURLANE – LA AUTONOMIE DE REGJON FRIÛL

Acuile dal Friûl si propon come prin pont programatic gjenerâl e fundamentâl il cambiament dal presint asset de Regjon Autonome Friûl - Vignesie Julie: la cuistion teritoriâl e istituzionâl di base e derive de nature stesse dal Friûl, come parsore ilustrade e riassunte.

Al Friûl i covente une istituzion teritoriâl autonome proprie, che lu poni tes cundizions plui favorevulis par decidi la proprie politiche amministrative sul propri teritori, par rispuindi ben ai siei bisugns fundamentâi, par favorî la inessite economiche e sociâl dai siei abitanti.

Acuile dal Friûl nol esclût par nuie la oportunitât di futuris riformis costituzionâls par riequilibrâ l'asset di cheste nestre Regjon Autonome, prime mai nassude e dopo mâl nassude, simpri plui sotane sot ogni profil dal strapodê triestin; e je dut cês la necessitât di capî prime di dut chel che za sot l'atuâl ordenament speciâl al è pussibil proviodi in favôr dal Friûl, in maniere direte, par efiet di une plui semplice leç regionâl ordenarie; e je di fat jentrade di pôc timp in vigôr, par efiet de L. Cost. 1/16, une riforme dal Statût Speciâl L. Cost. 1/63, in grât di produsi impuartants efiets sul Friûl e sul so teritori.

La gnove L. Cost. 1/16 e compuarte di fat implicazions di note pal Friûl:

cirî di spiegâle chi cuntun lengaç il plui pussibil comprensibil par ducj:

si partis par esempi dal tormentât non de Region Autonome e dal TRATUT

la cuistion dal tratut e je definitivementri superade; Triest e à cirût di cancelâ il Friûl non dome des cjartis gjeografichis ma ancje de denominazion uficiâl de comune istituzion regionâl; tai desideris triestins, la pretese sopression dal tratut e varès intindût rapresentâ la omogjeneizazion di dut il teritori regionâl te sô suditanze tai confronts dal unic, ecentric, forest, egoist, ostîl cjâf lûc regionâl triestin impostât dal alt; in realtât il tratut nol è mai stât eliminât dal ambit dal prevalent ordenament costituzionâl speciâl; ancje la ultime L. Cost. 1/16, dal sigûr caraterizade di un ranc di nivel jerarchic costituzionâl, di vigôr cronologjic resint, di prevalente eficacie speciâl, e conferme in maniere inconfutabil che il contestât tratut al è simpri stât, e duncje al à di jessi, come (no formâl) ricognossiment efetîf de dualitât regionâl cun fuarce sclîçade dentri a un ent teritoriâl unitari; compit di Acuile dal Friûl al sarà duncje di imponi ae burocrazie regionâl il rispiet di fundamentâi principis di legalitât costituzionâl.

Bisugne cjapâ at dal definitîf superament des cuatri vecjis provinciis ordenariis:

la gnove leç costituzionâl tal coment e à disponût dome in Friûl – Vignesie Julie (si ben che e à une gjeopolitiche tant divierse rispiet a chê de Val di Aoste) la totâl sopression e il complet superament des vecjis 4 Provinciis ordenariis, dant un gnûf e grâf colp ae rapresentance teritoriâl e istituzionâl dal Friûl, al moment rote in ben 17 UTI (parfin la piçule ex provincie gurizane e je stade dividude in dô), mintri il teritori de decimeotave UTI juliane e jê perfetementri dentri i confins de ex Provincie di Triest; ancje in chest fundamentâl passaç Triest e je stade come al solit favoride; la sopression plene e totâl des vecjis provinciis ordenariis, lontane dal superâ lis divisions gjeopolitichis che a metin cuintri, a indebilissin, a lambichin il Friûl, tai desideris triestins, e je stade perseguidade tal tentatîf di fâ sù di gnovis e plui grandis, oltri che al fin di eliminâ in maniere radicâl ogni cuintripês istituzionâl e teritoriâl rispiet ae Region e al so cjâf lûc; cualsisei al sedi stât l'intent dai podês fuarts triestins, i furlans a devin jessi ben cussients che, cumò, al è un vincûl costituzionâl che al determine la impussibilitât di ripristinâ par leç regionâl ordenarie lis 4 vecjis provinciis ordenariis, par vie de superiôr eficacie costituzionâl de abrogazion totâl des vecjis provinciis ordenariis tal ambit di chest ordenament regionâl speciâl; la Region Autonome, se e volès introdûsilu pal Friûl e par Triest, e je cjariade di cjatâ un ent teritoriâl intermedi tra Comuns e Region che al risulti completamentri gnûf.

La Region Autonome e ten lis propriis competencis esclusivis in materie di ents locâi:

ancje in riferiment ae gnove leç costituzionâl, pal legjislatôr regionâl ordenari lus UTI a son une semplice facoltât; l'erôr e l'orôr des UTI al podarà facilmentri vignî cancelât di bot des fondis se Acuile dal Friûl e riceverà adeguât sostegn in ocasion des prossimis elezions regionâls, la Region Autonome e conserve di fat la proprie facoltât esclusive e plui grande di istituî e regolamentâ i Ents Locâi e dut il lôr interni ordenament ancje in relacion aes propriis circoscrizions, secont il propri ordenament speciâl, ancje traviers une semplice leç regionâl ordenarie; si clamin Areis Vastis o Provinciis Regionâls, la sostance gjeopolitiche no cambiarà; la soluzion sostignibile e che e torne a dâ dignitât a dut il Friûl e consist te creazion di 2 entitâts aministrativis teritoriâls, istituzionâls e politichis, diretamentri rapresentativis, ben distintis, sul confin naturâl de planure furlane rapresentât de fôs dal Flum Timau: di une bande la region naturâl dal Friûl e di chê altre la aree de Citât di Triest, parcè che tâl sudivision e je riconducibile, e anzit naturâl, tai stes confins gjeografics, storics, politics propriis di tai dô diviers teritoris, o ben di une part il Friûl - componût des ex Provinciis di Gurize, Pordenon e Udin - e di chê altre de ex Provincie di Triest - coincidente cul ex Teritori Libar di Triest, Zone A -; viodût l'ûs dal criteri gjeografic te definizion dai confins tal câs dal Alt Adis/Sudtirôl, o calcolin che tâl metodi al devi valê ancje pal Friûl; cualchidun, a partî dai siei autôrs, par difindi la riforme des UTI a àn sostignût che ae furlanetât nol servîs un ent teritoriâl esponenziâl diretamentri rapresentatîf, ma come la italianitât ancje il Friûl al à l'inviolabil dirit naturâl di gjoldi di un so propri ricognossiment teritoriâl istituzionâl e gjeopolitic; un prin passaç al proviôt la imediade istituzion, dentri de Region Autonome uniche e par semplice leç regionâl ordenarie, de Aree Aministrative dal Friûl di une part e de Aree Aministrative di Triest di che altre, cun contestuâl sopression di ducj chei altris ents teritoriâi sovra-comunâi infra-regionâi, e conseguente semplificazion aministrative

(viodût che lis riformis veris ... a tain pardabon dulà che al covente, prime di dut i ents inutii pal citadin ... e duncje a costin tant di mancual a chel che al paie lis tassiss ... al fin di garantî miôr servizis ... rispietant e promovint pardabon ancje la identitât locâl naturâl, e no di sigûr chê imponude a taulin dal alt).

Chestes resinte riforme no taie fûr e anzit e costituis un precedent pe future riforme statutarie;

a vignaressin mantignûts i confins de atuâl Region Autonome Friûl - Vignesie Julie, che a davuelzarès la minime ativitât legjislativ, trasferint cuasi dutis lis competencis amministrativis (e, il prime pussibil, ancje legjislativis; i podêss legjislatîfs a àn bisugne dut câs di specifiche prevision di ranc costituzionâl) aes sôs dôs partizions teritoriâls, Aree dal Friûl di une bande e Aree di Triest di chê altre, pe amministrazion dai rispetîfs teritoris; la Region Autonome a varès il non di «Friûl - Triest» e sarès componude des rispetivis Aree dal Friûl di una bande e Aree di Triest di chê altre (cun riferiment a une specifiche propueste di revision costituzionâl, ex art. 63 L. Cost. 1/63 Statût Speciâl, che e asseigne al Consei Regionâl le relative facultât di iniziative legjislativ ex art. 138 Cost., secont il procediment che al è za stât fat par esempi pe resinte leç Costituzionâl 1/16).

I difensôrs de cussì clamade “unitât regionâl” si son simpri fâs notâ pe lôr marcade propension a blocâ la specialitât regionâl te vueide difese dal *status quo*, di là di dut metint in at simpri gnûfs pretescj par ostacolâ invezit il recepiment e il compiment de totâl unitât furlane; nissun al dinee il secolâr policentrisim dal Friûl, ma Acuile dal Friûl si apele a ducj i citadins furlans, residents in Friûl (indipendentementri de lenghe che a fevelin), par che si sintedin prime di dut furlans, come prime forme di autentiche libertât, par esempi di ogni artifici vuidât dal politichementri coret dominant spes ancje a nivel mediatic; chest al avantazarà la elaborazion condividue di une soluzion di ecuilibri tra i trê vecjos cjâfs lûcs provinciâi furlans di Gurize, Pordenon, Udin, lant daûr di un model inovatîf di division ancje teritoriâl dal podê amministratîf e politic; esemplis pussibii si cjatin in altris stâts federâi, che a rivin fin a trê capitâls comunis, cun diversis competencis ripartidis (es. Republiche Federâl Sud Africane).

Ta chest moment storic, chel che plui al conte al è preservâ il Friûl, prime ancjemò des sôs articolazions amministrativis internis, par altri al moment canceladis de L. Cost. 1/16, e ancjemò di plui frazionadis tes UTI, oltri ae fondamentâl pretese democratiche che Acuile dal Friûl e sint come inevitabil e ineludibile necessitât che lis plui impuartantis decisions gjeopolitichis sul Friûl a vignedin cjapadis dai furlans, al contrari rispiet a chel che al è fin cumò sucedût traviers pesants condizionaments esternis che il Friûl al à simpri subît cun grêf pericul identitari rispiet a sieltis fundamentâls in relazion ai propriis ents teritoriâi: dai relatîfs cjâfs lûcs (art. 2 L. Cost. 1/1963 sul cjâf lûc regionâl triestin) aes relativis circoscrizions amministrativis, dal trasferiment napoleonico dal Mandament di Puart, a chel austriac tal câs dal Comun di Sapade tal 1852, fin aes ancje resintis modifichis dai confins provinciâi ancje graciis ae stesse riforme resinte des 18 UTI, al risulter evident che il metodi di imposizion autoritarie di cjâfs lûcs e confins dal alt, sul teritori furlan, nol è par nuie cambiât.

La soluzion tecniche, par ricondusi a unitât il policentrisim furlan escludint influencis esternis e favorint une plui democratiche decision dal bas, e podarès jessi, a nivel costituzionâl, une riserve di leç provinciâl rinfuarcide, mintri, a nivel di legjislazion regionâl ordenarie, la prevision di une riserve statutarie simpri provinciâl, pe ripartizion ancje teritoriâl dai relatîfs podêss (baste che e sedi une vere volontât politiche e, volint, al sarà pussibil cjatâ une soluzion tecniche par cualsisei probleme, cjâfs lûcs provinciâi comprendûts).

Chestes riforme no oblee par nuie il legjislatôr regionâl a istituî la Citât Metropolitane di Triest;

su la eventuâl Citât Metropolitane di Triest (si trate di une des variis semplicis facultâts proviodudis de gnove L. Cost. 1/16, in favôr de discrezionalitât dal futûr legjislatôr regionâl ordenari), che riferît al teritori al podarès comprendi la Citât stesse e i teritoris dai ents comunâi de sô ex Provincie che a volaran aderî su la base di fundamentâi principis di sovranitât popolâr e corispondence, secont i orientaments democraticementri esprimûts de rispetive base popolâr o almancul istituzionâl, Acuile dal Friûl e je

interessade dome al plen e efetîf rispiet dai confins naturâi prime di dut gjeografics dal Friûl e in seconde batude ae plene e proporzionâl garanzie de paritât di tratament par esempi su competencis aministrativis e a relative dotazion finanziarie rispiet a chel providût pal Friûl, viodût e considerât che dome chest ultin al costituis l'esclusif fundament dai siei interes; in ogni câs no si podarà aprovâ un Ent teritoriâl specific pe Citât di Triest se prime no vignarà aprovade la istituzion di un Ent teritoriâl e rappresentatîf compagn ancje pal Friûl; la aree furlane di fat a devi jessi finalmentri ponude sul stes plan rispiet ae aree triestine; Acuile dal Friûl e riten fundamentâl e indispensabil che e sedi une impostazion regionâl binarie che e sedi pardabon paritarie e rispietose di duci e doi i teritoris; se prime no vignarà concedût un ent teritoriâl istituzionâl rappresentatîf pal Friûl, ancje la istituzion dal correspondent ent triestin al podarà spietà.

CHESTE RESINTE RIFORME NUS SBURTE A INSUMIÂ LA REGJON AUTONOME FRIÛL ISTITUIDE E RINFUARCIDE PAR LEÇ COSTITUZIONÂL

In considerazion des primis disposizions che si dovaressin introdusi graciis ae future leç regionâl ordenarie di imediade abrogazion des UTI, cun chest Acuile dal Friûl no intint cancelâ la proprie idee di fonde di lunc periodi che e proviôt une Regjon Autonome Friûl, al sarà partant necessari che il Consei Regjonâl al puarti ae Cjamare e al Senât la iniziative di modifiche statutarie pal recepiment costituzionâl di chest gnûf asset istituzionâl che la Regjon Autonome e sarà in ogni câs in grât di fâ jentrâ subit a regjim secont il propri ordenament speciâl atuâl, sei pûr tal inizi a un nivel sole aministratîf e limitât aes dôs Areis Aministrativis dal Friûl e di Triest. Tâl modifiche istituzionâl, e il so sucessif recepiment costituzionâl, e permetarà une plui grande rappresentance politiche ancje des cuatri Identitâts presintis sul teritori regjonâl: Furlans, Slovens, Todescs, Talians, contribuint finalmentri a superâ la atuâl situazion di framentazion aministrative, tal ultin esasperade cui gnûfs confins des UTI, imponudis dal alt cun andis parossistichis e une vore antidemocraticis, se no adiriture coloniâi, su teritoris di tradizional stanziament des plui variis comunitâts linguisticis autoctonis.

Graciis al gnûf asset regjonâl, al sarà pussibil domandâ al Guvier talian la atribuzion di plui numars pussibii des plui relevantis competencis e des relativis risiervis finanziariis, sui rispetîfs teritoris, in ducj i setôrs ritignûts strategjics par il rilanz ancje economic de Regjon stessee, cun atribuzion di tâi podês aes dôs entitâts teritoriâls che le componin. Si procedarà ancje ae domande de eliminazion de funzion statâl di indreçament e coordinament des ativitâts Regjonâls, cuntune sole ecezion par chel che al rivuarde la Costituzione, i rapuarts cu la Union Europeane, i oblics derivâts dai tratâts internazionai.

Tant par esempi, o fasìn chi la liste dai principai titui di competence de Regjon Autonome Friûl, o dut câs de Aree Autonome dal Friûl, in sostance parificâts ae atuâl Provincie Autonome dal Sud Tirôl:

- competence plui largje ae cooperazion transfrontaliere, ae stipule dai relatîfs acuardis cun omolics ents forescj e minorancis linguisticis a nô plui dongje, ae relative atuazion ancje legislative (es. Macro Regjon Alpine, Alpe Adria, ecc. ecc.);
- trasformazion in competencis legjislativis provinciâls primariis o esclusivis di dutis (salf dome chês inseparabilis, che a podaressin restâ in câs ecezionâl di titularitât regjonâl: es. tignude dai libris fondiariis ex austriacs; aeropuart regjonâl ecc.) lis atuâls competencis legjislativis regjonâls ancje concorintis o atuativis providudis dal atuâl Statût Speciâl;
- clausule residuâl gjenerâl pe atribuzion al Friûl (e a Triest) di ogni competence no espressementri listade tra chês statâls o regjonâls;
- assegnazion al Friûl (e a Triest) di dutis lis competencis plui largjis tai ambits plui leâts al teritori: ambient, paisaç, urbanistiche, risorsis naturâls, materiis primis, fonts di energjie;
- competence assolute tal setôr de energjie: concessions, produzion, trasferiments, distribuzion;
- competence esclusive te materie dal ordenament dai ents locâi secont la sussidiarietât;
- competence primarie su dutis lis materiis di interès economic locâl;

- competence primarie te valorizazion dai prodots locâi e de lôr comercializazion, e ancje de stipule dai relatîfs contrats comerciâi;
- competence plene in materie di ricercje e svilup ancje tecnologjic;
- competence assolude tal setôr de publiche istruzion di ogni ordin e grât, comprendude la gjestion dai insegnants;
- competence esclusive su sanitât, organizazion dai servizis sanitaris, igijene, sigurece sul lavôr;
- competence plene in materie veterinarie, zootechniche, e simii;
- competence plene tal setôr dai bens storics, archeologjics, architetonics, artistics e culturâi;
- competence esclusive tal cjamp des telecomunicazions di interès provinciâl o locâl, te gjestion des frecuencis e di une proprie aziende radiotelevisive publiche par ducj i grups linguistics presints sul teritori;
- plui grande autonomie in materie di toponomastiche, cartelonistiche stradâl e di segnalazion, urbanistiche e turistiche (es: trois di montagne), su la Protezion Civîl, su la Forestâl Regionâl e altris Ents funzionai al gnûf asset regionâl;
- trasferiment des competencis relativis ae Motorizazion Civîl;
- trasferiment des competencis stradâls, comprendudis lis autorizacions e lis concessions su lis proprietâts coreladis: relits stradâi, edificis, apartments, uficis;
- trasferiment no onerôs al Friûl par fins istituzionai di dutis lis areis militârs no dopradis;
- gjestion e aministrazion dal personâl public, comprendude la stipule di contrats coletîfs;
- plui larc dirit di partecipazion e organizazion tes fasis di aciertament, riscossion, control su lis impostis diretis e indiretis simpri denominadis e riferidis al propri teritori;
- introduzion de regule gjenerâl sul caratar ecezionâl de fiscalitât e de finance statâl e regionâl, cun atribuzion direte al Friûl (e a Triest) di almancul cinc sescj de butade fiscâl prodote dai rispetîfs teritoris;
- introduzion di une sfere di autonomie locâl pe fiscalitât di vantaç davuelte a agjevolâ lis areis di confin, periferichis, depressis, montanis;
- estension dal demani idric trasferît al Friûl (e a Triest) ancje su chel lagunâr e portuâl;
- clausule residuâl di atribuzion al Friûl (e a Triest) di ducj i bens publics no enumerâts in maniere esplicite tra chei statâi o regionai in favôr dal demani e dal patrimoni indisponibil dai rispetîfs teritoris provinciâi;
- abolizion dal coordinament statâl in ducj i setôrs dulà che la relative competence e ven atribuide al Friûl (e a Triest), salvîs dome lis facultâts di sostituzion a garanzie de unitât statuâl, tai limits des facultâts locâls di justizie costituzionâl;
- abolizion dl comissariât dal guvier e trasferiment des relativis competencis ae Presidence Provinciâl, salvîs dome lis facultâts di justizie costituzionâl;
- introduzion di agjevolazions processuâls pe tutele jurisdizionâl plene e efetive dal pluralisim linguistic;
- facultât di cooperazion cu lis Fuarcis dal Ordin Statâls e de Justizie Statâl, midiant dirit a istituî un Cuarp di Vigilance dal teritori, cun competence concorinte difondût ancje ai confins internis e esternis dai rispetîfs teritoris.

Ta chest contest, ancje in considerazion dal fat che al podarès sucedi par efiet di une leç statâl di plui semplice aprovazion rispiet a chês di nivel costituzionâl, al sarà augurabil completâ ancje il passaç (o miôr il tornâ) ae nestre Regjon Autonome (e duncje al Friûl) dai Comuns dal Mandament di Puart (dal inizi dal 1800 in Provincie di Vignesie, par imposizion di Napoleon, confermade dal alt ancje di bande dal Guvier Austriac, al contrari de Serenissime che e veve simpri rispietât i confins de Patrie dal Friûl, si ben dome in maniere formâl, daspò de conquiste armade de sô porzion centri occidentâl) che a vuelin fâ part, come za confermât ben ancje cun regolâr Referendum popolâr par esempi di bande dal Comun di Cinto Caomaggiore. Acuille dal Friûl si impegne a seguî e a sostignî chest dificil percors, scomençât tancj decenis fa, ma ancjemò lontan dal finî. In gjenerâl si viôt che ancje rapuarts cul Venit e soledut cun Vignesie (si fâs par dî) no simpri a son stâts corets, e no di sigûr par colpe dal Friûl o dai furlans, che a àn dome votât par difindi la lôr identitât.

SETÔRS SPECIFICS DI INTERVENT

A titul esemplificatîf, o listin chi lis liniis programatichis che, cul sostegn dai Eletôrs e des Eletoris che nus premiaran, o volaressin realizâ tes variis materiis.

Si trate di un program gjenerâl viert ae partecipazion di ducj i eletôrs: ogni forme di contribût e ancje di critiche, se costrutive, e sarà benvignude e gradide.

TABELE GJENERÂL DAL PROGRAM ELETORÂL TAI VARIS SETÔRS

1 - POLITICHIS PE MONTAGNE	pag. 7
2 - AGRICULTURE, FORESTIS, AMBIENT, DEMANI IDRIC REGJONÂL	pag. 8
3 - OPARIS PUBLICHIS E INFRASTRUTURIS STRATEGJICHIS	pag. 9
4 - ENTS LOCÂI E AMINISTRAZION REGJONÂL	pag. 10
5 - SANITÂT, FAMEE, SOCIÂL	pag. 12
6 - LENGHE E CULTURE	pag. 14
7 - SCUELE E UNIVERSITÂT	pag. 15
8 - TRASPUARTS E VIABILITÂT	pag. 16
9 - ATIVITÂTS PRODUTIVIS, INDUSTRIE, CUMIERÇ, PLENE OCUPAZION	pag. 17
10 - GJESTION E VALORIZAZION DAI REFUDUMS	pag. 18
11 - SIGURECE	pag. 19
NOTIS FINÂLS E RINGRACIEMENTS	pag. 20

SOSTEN ACUILE DAL FRIÛL ... BASTE UNE FIRME ... BASTE UN VÔT !!!

web www.acuiledalfriul.org e-mail acuiledalfriul@gmail.com
facebook [facebook.com/Acuile-dal-Friul](https://www.facebook.com/Acuile-dal-Friul) telefono 334.2512084



Prime il Friûl, prime i furlans !

1 - POLITICHIS PE MONTAGNE

Adeguament de rêt stradâl

Realizazion di oparis no invasivis, che a metedin in sigurece e che e mioradin il trafic su lis stradis di montagne, utilis ancje al svilup turistic e economic dai teritoris.

In puescj bielissims a son stradis di montagne in brutis cundizions; bisugne dal sigûr agjevolâ la mobilitât in montagne; chest al rientre tra i prins principis par rindinus pussibile la vite e il svilup.

Oparis di digjitalizazion avanzade e infrastruturis di comunicazion capilâr

E permetin di dotâ di infrastruturis tecnologjichis i teritoris plui periferics, par ridiju apetibii par ativitâts modernis, cun bas impat ambientâl e bon redit.

Cure pal decôr dai prâts e dai boscs di montagne

Al risulte di fundamentâl impuartance, ancje idriche gjeologjiche, la periodiche cure dai terens di montagne, specie se destinâts a prât, sei pe finalitât di igjien publiche sei pal gjenerâl decôr, di realizâ, par esempi, traversi regolârs e periodics tais de jerbe, che tantis voltis a vegnin trascurâts sei dai proprietaris sei di chei che a doprin il prât.

La Aministrazion Regionâl a incentivarà chestis azions, te vision di une revision acurade de spese publiche, par esempi dant une esenzion sui tribûts regionâi e locâi condizionade ae positive verifiche de efetive cure des relativis proprietâts montanis.

Presidis economics locâi fis ancje tai piçui paîs

A son ativitâts economicis privadis di primarie necessitât pe vite sociâl, che a laran sostignudis ancje tal inviâ dulà che no son plui, parcè che essenziâi par garantî un minim di vite sociâl, specie tai paîs piçui e plui isolâts, a vantaç dai residents e dai turiscj, che a podaran cussì cjatâ sul puest i servizis basilârs.

Gjestion idriche e depurazion

Il sisteme di gjestion idriche e di depurazion e devi jessi articolât in ambits locâi di valade o di zone par evitâ assorbiments de risorse idriche di bande di grops di fûr region.

Sfrutament des risorsis idrichis o gjeotermichis

L'ordenament dal demani idric regionâl al devi jessi dal dut riformât par sigurâ aes comunitâts locâls il control des risorsis idrichis cun miôr servizi a minôrs coscj.

La Region a devi fâsi caric di ripuartâ a se lis concessions di sfrutament des risorsis idrichis e gjeotermichis in scjadince e di mantignî chês gnovis. Chest par evitâ che a passedin in mans extra-regionâls. I concessionaris a devin vignî vincolâts a furnî energjie a coscj ridots ae montagne.

Incentîfs ae formazion dal personâl di bande des aziendis turisticis

Sostegn aes aziendis ricetivis e leadis al turisim tal formâ in maniere adeguate il personâl, par miorâ il rapuart cul turist, ancje traviars la promozion de imagjin aziendâl.

Incentivâ la partecipazion cun formulis indiretis, soreddut di "detassazion".

Sostegn a gnovis impresis e ativitâts compatibilis cul teritori

Sostegn aes fameis o aes piçulis impresis agriculis che a scomencin une ativitât primarie.

Incentivazion al recupar dai passons e al recupar des ativitâts boschivis.

Sostegn aes ativitâts inovativis cun alte tecnologjie.

Sostegn comerciâl ai prodots tipics

Svilup di un "centri di catalogazion, valorizazion, racuelte, distribuzion" daei prodots locâi, il plui pussibil a gjestion consortîl, o dut câs integrate tra public regionâl - privât produtôrs.

Agjevolazions fiscâi (se necessari concuardadis cul Guvier centrâl)

Limitazion de aplicabilitât dai studis di setôr par ativitât a bas redit

Elaborazion di speciâi sistemis di paiament dal lavôr stagjonâl in montagne

Riordin fondiari condividût

Elaborazion cun concurs dai Comuns di un riordin fondiari gjenerâl condividût al fin di consintî un miôr rindiment dal teritori i bande di aziendis agriculis e turisticis, evitant l'abandon, cun assegnazions prioritariis ai residents specie se coltivadôrs direts.

Recupar dal patrimoni edilizi

Elaborazion cul concurs dai Comuns di un sisteme urbanistic di recupar dal patrimoni edilizi tipic cun destinazion abitative o lavorative, cun assegnazions prioritariis aes piçulis ditis ediliziis locâls (il recupar fat cun sucès a Sauris al larès slargjât a dute le montagne furlane).

Assessorât aes politicis pe montagne cun sede a Tumieç

I uficis di gjestion a devin jessi dongje al teritori e duncje a varan sede a Tumieç.

Bisugne di coinvolzi i Comuns di montagne tes politicis regionâls.

2 – AGRICULTURE, FORESTIS, AMBIENT, DEMANI IDRIC REGIONÂL

Agroalimentâr e bio economie

Favorî il svilup tecnologjic e comerciâl pal alimentâr e no dome, ancje viers destinazions no alimentârs, intune logjiche di BIO ECONOMIE sostignibile, circolâr e rinovabile (bio plastiche, tiessûts, energjie rinovabile).

Incentîfs a sistemis inovatîfs pe trasformazion de produzion agricole, miôr eficiencie, mancun impat ambientâl, riduzion dai coscj energjetics, doprâ la part vegjetâl come combustibil (es: Cipât, pelets..)
Promovi sistemis inovatîfs pe conservazion dai prodots come i trataments a alte pression, eficiente cjadene dal frêt, industrie conserviere, sparagn energjetic.

Svilup de orticulture e fruticulture

La domande simpri plui grande, sei a nivel nazonâl che internazonâl, di prodots che a derivin de orticulture e des piçulis pomis, ancje coltivâts in sere, al pues rilanzâ lis ativitâts dai piçui e medis imprenditôrs agricui furlans, sopuartâts de Region, cu la creazion di canâi istituzionai par favorî la promozion e la distribuzion.

Rilanc dai arlevaments eco-compatibii e passons bovins montans/culinârs e di planure

Dâ plui impuls al svilup dal arlevament di bovins di cjar domandât dai marcjâts (Angus e Chianina) in spazis vierts pluitost che in stale; in merit ai bovins di lat, otimizâ la cualitât dal prodot e organizâ centris di racuelte eficients gjestîts di associazions di produtôrs.

Vitivinicul

Sostignî i produtôrs di vin e siei derivâts oltri a valorizâ lis vîts autoctons leâts al Friûl

Revision gjenerâl des formis di tutele e certificazion de cualitât agroalimentâr

Rinfuarciment de denominazion FRIÛL su dut il teritori furlan

Favorî la creazion di grandis cooperativis o societâts/associazions de vitiviniculis buinis di imponisi sui marcjâts cui volums di produzion necessaris pes sfidis de internazionalizazion.

Incentîfs pe realizazion di stabiliments di media entitât

Favorî il svilup di prodots inovatîfs, a partî des materiis primis tipichis locâls, par sodisfâ un marcjât in continue evoluzion.

Favorî realtâts imprenditoriâls buinis di trasformâ il prodot fresc (es. pomis e verdure) e confezionâlu (in conservis e surgelâts).

Sostegn aes piçulis aziendis agroalimentârs sot i cinc dependents

Ufrî la pussibilitât a chestis piçulis realtâts di podê lavorâ "in deroghe" a tantis leçs statâls in vore in materie igijeniche sanitarie secont modalitâts plui tradizionâls e snelis.

Sfrutament razionâl dal patrimoni boschîf di bande di aziendis locâls

Incentivâ la nassude di aziendis locâls (seis) pal sfrutament controlât dal teritori boschîf regionâl.

Favorî lis formis di produzion energjetiche nete e locâl di silviculture (valorizazion dai scarts, produzion cipât, produzion pelets).

Plui fonts e invistiments pe agriculture

Tornâ a ordenâ la distribuzion dai fonts regionâi, par plui invistiments te agriculture, cun trasferiment di somis vuê destinadis (cence utii) a altris ambits.

Riforme des politichis agriculis regionâls

Favorî projets smirâts e di cualitât che a sedin rispietôs dal teritori e des peculiaritâts locâls

Favorî l'associazionisim ancje pes categoriis tra i piçui imprenditôrs agricui regionâi.

Difese dal control locâl su lis risorsis idrichis

L'ordenament dal demani idric regionâl al devi jessi dal dut riformât par assicurâ aes comunitâts locâls il control des risorsis idrichis cun plui servizi a mancûl coscj.

Creazion di une societât controlade regionâl pe protezion e la gjestion dal patrimoni idric regionâl e par coordinâ il sfrutament de risorse idriche tal rispiet dal ambient e des peculiaritâts dal teritori.

Là che al è pussibil a dovaran jessi mantignudis e incentivadis lis esperiencis comunâls di gjestion direte des risorsis idrichis (l'esempli di Çurçuvint al devi jessi cjàpât a model).

3 - OPARIS PUBLICHIS E INFRASTRUTURIS STRATEGJICHIS

Oparis publichis eco-compatibilis cjàpant dentri e informant lis comunitâts locâls

La realizazion di gnovis oparis publichis une vore di impat e necessariis e proviôt la organizazion di dibatits publics preventîfs cun vierte e leâl partecipazion plui largje pussibil des comunitâts e dai comitâts locâi par cirî la miôr soluzion pussibile.

Il mega-eletrodot Udin-Redipulie al è stât declarât in maniere uficiâl abusîf di bande dal Consei di Stât, e partant al dovarà jessi soterât, ancje se fasin fente di nuie. Acuile dal Friûl e je pal plen sostegn ancje legâl de Region ai Comuns e Comitâts che a fasin ricors.

Colegaments direts, svelts e eficients, tra i trê principâi cjâfs lûcs dal Friûl

Parcè mai i collegaments direts tra Gurize, Pordenon, Udin a risultin cussì lents? Bisugne unî il Friûl, prime di dut a nivel di infrastruturis. Tâl progjet al dovarà jessi inter-modâl, eco-sostignibil, tecnologjichementri avanzadissim, soregut prioritari.

Recupar des feroviis locâls dismetudis

Il sisteme di collegament ferroviari locâl al devi jessi valorizât e ampliât. Model interni al podarès jessi la Ferovie Udin-Cividât, che e va ampliade e rinfuarcide cun necessariis tecnologjiis pe sigurece. Un model esterni al podarès jessi la rêt ferroviarie locâl sudtiroles.

Aeropuart regionâl Friûl e Triest

L'aeropuart regionâl di Roncjis di Monfalcon al à di cambiâ, al à di vê une funzion di centralitât pe intiere Region e pes aziendis che chi a operin, cui miôr e plui eficaçs collegaments cu lis areis internis regionâls e i trê Cjâfs Lûcs dal Friûl (Gurize, Pordenon, Udin).

La Region no pues continuâ a riplanâ simpri lis pierdits di une societât di gjestion che fin cumò e à pensât dome a jessi funzionâl ae solite Triest, ma e devi rindi economicamentri ative cheste impuartante infrastrutture e ativitât, travers rotis e collegaments cun areis europeanis che, ancje colegadis al turisim, a puedin puartâ la gjestion in atîf, e diventâ un moment di promozione par dut il teritori regionâl.

Rilanç de portualitât furlane

Acuile dal Friûl e propon il distac dai puarts furlans di Monfalcon e Puart di Noiâr dal atuâl centri di comant triestin che si sta dimostrant come un dai fatôrs che a stan scjafoiant il so svilup; in alternative la soluzion di rilanc e devente il strenzi plui fuartis aleancis cu lis plui grandis aziendis di traspuart fier-mâr Europeanis, secont la lôr za confermade volontât di preferî il pôl di chescj nestris puarts rispjet a chel tant plui lontan e debil di Triest.

Acuile dal Friûl e sosten la autonomie e la concorence, secont la efetive paritât di tratament tra i teritoris che a componin la Region, ancje come spese publiche regionâl in materie portuâl, ma e riten che la aree portuâl furlane e devi jessi rilancade par favorî la economie de intiere Region, ancje tornant a modulâ la spese sul puart di Triest, rispjet a oparis no strategjichis.

Fonts energjetichis rinovabilis

Favorî un fuart svilup sul teritori dal doprâ fonts energjetichis rinovabilis, pe difese ecologjiche simpri plui comprometude, oltri a un naturâl mancûl impât di coscj ancje economic su lis fameis e su lis ativitâts produtivis.

4 - ENTS LOCÂI E AMINISTRAZION REGIONÂL

Cancelazion des disevot UTI e lôr sostituzion cun doi ents teritoriâls autonomis e rappresentatîfs metûts a nivel propri de aree vaste (intermedi tra Comuns e Region)

Lis Unions Teritoriâls Intercomunâls, istituidis cun L.R. 26/2014 midiant comissariaments daspò anulâts de Magjistrature Aministrative, di pôc introdusudis come formis obligatoriis di esercizi associât di funzions comunâls, a son ents publics teritoriâi componûts di unificacions imponudis di Comuns, calâts dal alt, a taulin, cence nissun criteri diviers de miope e adiriture ideologjiche e volontât di superament totâl dai ents di aree vaste. Lis UTI no funzionin; a àn za dimostrât ducj i lôr limits; mai a podaran funzionâ (al pont che la leç regionâl originarie e je stade za cambiade plui di vincj voltis): une assolude

vergogne, un disonôr indegn pal Friûl, pe Regjon dal dopo Taramot, che intun timp no lontan al è stât di esempi pe Italie intiere.

Come se nol bastàs, a son stadis introdots parfin deroghis che si aplichin dome aes UTI juliane, a dimostrazion palese che Triest e à simpri ce che e domande, ma al di là des capacitâts negoziâls dai triestins, chel che al risulte intolerabil al è il solit câs di palese disparitât di tratament rispiet al Friûl.

I ents di aree vaste si puedin semplificâ, ma no abolî completementri, soledut intune regjon composite e particolâr, in realtât duâl, come che e je la Regjon Autonome Friûl – Vignesie Julie. Si tegni a mens daspò come, di là di dut, i ents di aree vaste a esistin in ducj i ordenaments democratics, come ents intermedis, no dome pal associazionisim di bande comunâl, ma soledut pal decentrament di bande regionâl.

Il caratar coatîf des UTI, e dut câs, ancjemò di plui, la gravissime frammentazion teritoriâl di stamp coloniâl che a àn provocât, tra l'altri dome a dan dal Friûl, a costituissin une menace une vore serie, oltri a jessi un at di dubie legjitimitât costituzionâl, par esempi cuintri la unitât teritoriâl de minorance (in Friûl in veretât une maiorance) furlane dentri di un teritori dai confins gjeografics e storics ben definîts, une pratiche di arbitrari frazionament aministratîf imponût in clâr contrast rispiet a tantis indicazions europeanis pe protezion e tutele des minorancis linguistichis autoctonis.

Lis dôs Areis Aministrativis dal Friûl e di Triest, che a laran a sostituî subit lis disevot UTI, a viodaran ricognossude tra lôr une precise personalitât juridiche e a dovaran di sigûr gjoldi di legjitimazion populâr direte par ducj i lôr orghins, cun plene autonomie, fin dal inizi statutarie, regolamentâr, aministrative, finanziarie e v.i., e ancje legislative, te prospetive di une sucessive riforme, ancje costituzionâl, dal asset de Regjon Autonome.

Riorganizzazione dai ents publics teritoriâi, a partî de Amministrazion Regionâl

La Regjon, a cjâlâ ben, e risulte l'unic ent public teritoriâl statuâl che, tai ultins dôs mandâts, no à mai subît nissune riforme, ma al contrari al sarà necessari intervignî cuntune profonde e serie riorganizzazione, no dome rivuart ai orghins politics e rappresentatîfs, ma ancje bucratics e esecutîfs.

Il pluralisim istituzionâl al va tutelât come fatôr democratic; a van taiadis no tant lis poltronis, ma plui che altri lis indenitâts, i vitalizis, i privileçs, lis spesis improduttivis o ben cence une sostanzial justificazion o efetive rese.

Se o lin a viodi lis funzions atribuidis o ben esercitadis, soledut se aministrativis de Regjon e varessin di jessi destinadis aes struturis plui dongje ai citadins, lant viers il massim decentrament pussibil, in atuazion dal fundamentâl principi proviodût dal art. 5 de Costituzion, delegant soledut ai Comuns, o ai gnûfs ents di aree vaste.

Par conservâ e potenziâ la autonomie speciâl, o dovaressin decentrâ lis competencis de Regjon in favôr soledut dai Comuns e daspò ancje Aree Aministrative dal Friûl.

Acuile dal Friûl al guvier de Regjon e propon une gnûf stîl di guvier: no plui il Friûl al servizi de Regjon, ma pluitost la Regjon pal ben dal Friûl e de Citât di Triest.

La idee puartante de riforme autonomiste regionâl e je cence dubis la sussidiarietât, ven a stâi propite il contrari dal resint acentrament regionâl in ducj i setôrs, indreçât soledut al potenziament dal podê dal cjâf lûc triestin tal contest regionâl, a discapit in maniere particolâr dai teritoris de ex-Provincia di Pordenon e de montagne furlane e de Cjargne.

Svilup dai rapuarts politics, istituzionâi, culturâi, economics cu la aree dal Centri Europe

La stesse posizion gjeografiche dal Friûl e devi favorî i rapuarts privilegjâts cu la Mitteleurope.

I nestrîs principâi interlocutôrs a son stâts, di simpri, e a son ancjemò di plui vuê, i Stâts che a formin il cûr de Europe: Austrie, Gjermanie, Baviere, Slovenie, Republiche Ceche, Ongarie e Polonie, Slovachie e i Stâts de ex-Urss che cun chei o vin simpri interazioni economiche e comerciâls e cun lôr o condividin ancje un spirt culturâl mitteleuropean.

La valorizazion di chescj rapuarts e devente un bon scambi sociâl e economic dulà che la nestre Regjon, e in particolâr il Friûl, e devi smirâ, par vê i vantaçs economics che nus spietareassin di dirit.

La atuâl “classe dirigente”, cun clare impronte triestine-centriche, e à dimostrât il totâl faliment tal jessi in grât di svilup e mantignî chescj rapuarts, penalizant la economie regjonâl e tal stes timp no rivant nancje a svilupâ la portualitât de proprie Citât.

La apartignince dal Friûl–Vignesie Julie ae Macroregion Alpine, istituide de Union Europeane, pensade propri pal svilup de aree che e cjape dentri ancje Austrie, Baviere, Slovenie, Svizze e cualchi regjon de France, invezit che jessi sfrutade come un significatîf e impuartante leve economiche, e ven a pueste trascurade in favôr di une Macroregion Mediteranie dulà che il Friûl non si sint par nuie di apartignî e dulà che no si à nissun risultât significatîf.

E sarâ partant necessarie une significative inversion di marce, pontant cun decision ae valorizazion de presince dal Friûl te Macroregion Alpine par ativâ formis di colaborazion e svilup teritoriâl buinis pal nestri teritori e aes nestrîs aziendis, oltri ae vocazion storiche e mitteleuropeane di cheste Regjon.

Il Friûl al è periferic rispjet a Rome, a Triest, o a dutis lis altris citâts talianis, ma al risulde centrâl rispjet ae Mitteleurope, ae Europe Continentâl, dulà che e je une vore plui dongje, in ducj i sens.

5 - SANITÂT, FAMEE, SOCIÂL

Superament immediât de riforme sanitarie discriminatorie che al Friûl e lasse dome tais

Il Servizi Sanitari Regjonâl, un timp braûre di cheste Regjon a nivel statâl, al sta pierdint une vore posizions tes classifiche de cualitât sanitarie in Italie.

Chel che plui al fâs scandul a son ancjemò une volte lis disparitâts di tratament tra la aree furlane e la Citât di Triest; nol è tolerabil che mintri in Friûl (Pordenon-Udin-Gurize-Cjargne e altris zonis di montagne) i ospedâi minôrs come par esempi Manià, Cividât, Glemone (che a son chei che a spindin di mancûl, e a sigurin di là di dut un vitâl presidi a teritoris dispès periferics e erts, oltri a limitâ lis codis ai Pront Socors di Udin) e i ponts di nassude (o nomenin dome chel di Tisane o chel di Gurize) a vegnin une vore ridimensionâts e in plui câs parfin sierâts, in favôr de solite Triest sei za in program la centralizazion regjonâl de assistance ae maternitât avanzade li dal Burlo Garofalo di prossim ampliament e aditure la costruzion di gnovis structuris sanitariis in zonte rispjet ai ospedâi gjenerai citadins za avanzadissims e simpri disponibii pai residents di Triest.

Si trate di autentiche discriminazions, fatis come al solit su la piel dai citadins residents in Friûl, o ben a dan de maiorange dai contribuents de Regjon, cuntune azion politiche che e tocje il razisim anti-furlan.

Acuile dal Friûl si impegne, secont la efetive paritât di tratament tra ducj i citadins, a un gjenerâl rieculibri de spese sanitarie, che e risulti pardabon proporzionade rispjet ae popolazion residente in ducj e doi divers teritoris che a componin cheste Regjon.

Chest al favorirà une maiôr omogeneitât dai servizi, cence nissun pericol pe sô cualitât, specie se e vignarà permetude une sane concurence tra lis structuris dal Friûl e chês di Triest, garantint soredut lis structuris di pront intervent, cuntun voli particolâr là che lis cundizions gjeografichis o ambientâls lu domandin, come dongje di impuartantis areis turistichis o di zonis di dificil acès come la aree montane.

Ripristinament dai ponts e des structuris pal Pront Intervent tes variis zonis comò scuviertis o dulà che a son stâts sierâts o limitâts i servizis ospedalîrs.

Garantî la urgjence, no dome cui mieçs di socors avanzât (elisocors, ambulancis), ma ancje midiant il volontari monitorament telematic dai sogjets plui a risi, o il just potenziament dai Servizis Ambulatoriâi in forme capilâr sul teritori.

O volin tornâ a puartâ la Sanitât Regionâl a jessi un pont di orgoi e un esempi pal rest de Italie, rivodint la atuâl plan di concentrament de sanitât publiche te uniche zone de Citât di Triest.

Difese de salût publiche

Une impuartante problematiche sociâl e je rapresentade dal alt numar di muarts cause di “muart improvise” soledut tra i zovins.

Al risulte fondamentâl ativâ dai canâi medics - sientifics, ancje in colaborazion cun ents di ricercje, par studiâ la tipicitât e incidi in maniere determinante sui stîi di vite sbaliâts de nestre societât e sui fatôrs ambientâi che a son la cause principâl, propri te otiche di difindi simpri di plui la vite e la salût di cui che al è a stâ in cheste Regjon, ancje cul coinvolziment des istituzions scolastichis.

Promozion de famee e incentîfs pal miorament dal balanç economic familiâr

Difindi la famee, favorî gnovis nassitis, sostignî i nuclis familiârs esistents, creant ambits di sigurece economiche simpri maiôrs, cuntun caratar di proporzionalitât e continuitât.

Lis simpri plui scjarsis risorsis publichis a devin creâ concretece e il Friûl al à bisugne di gnûfs fîs e fiis tant che inestimabil fatôr di continuitât e ricjece, soledut ideâl e morâl, ma ancje economiche, almancul indote, se no ogni bataie autonomiste e devente fin a se stesse, e destinade ae inutilitât tal zîr di pôcs decenis.

Il sisteme sudtiroloês al gjolt dal plui bas tas di aborts; al risulte bon come cualitât des nassitis par famee; al devi costituî un model di studiâ e cjapâ a esempi, viodût che ancje lôr a son cussients de impuartance des prossimis gjenerazions pal futûr de Autonomie e pe tignude de societât.

O crodin che l'aiût e il svilup a spietedin prime di dut ai abitants dal Friûl, e dopo in seconde batude si puedi pensâ a une integrazion gjenerazionâl midiant int che a rivi di altris bandis dal mont, pene la cancelazion de identitât nestre.

Par chest il futûr guvier regionâl al dovarà fâsi caric di cheste primarie responsabilitât, intervignint soledut cu la formazion, oltri a aiûts organics e strutturâi ancje di medi e lunc periodi, tal compagnâ lis fameis viers un gnûf model sociâl, che al dedi un futûr seren al Friûl e ai siei abitants.

Lis variis formis di incentivazion ae natalitât, e di sucessîf sostegn ae infanzie, cun particolâr rivuart ai câs plui problematicis, a dovaran vignî dal dut riformadis e ampliadis, deventant un vêr sostegn aes fameis, e non un sempliç bonus *una tantum*, plui di semplice forme episodiche che e je pardabon utile a une reâl continuitât gjenerazionâl.

De concrete e efficace di chestis misuris, ancje culturâls, al dipent il futûr stes, fisic prime che identitari e linguistic, te nestre cjare comunitât linguistiche furlane, che vuê si cjate ben al di sot dal tas di 2,2 fîs par femine fertile, di semplice sostituzion demografiche (dal pari e de mari e de mortalitât o infertilitât), che e va a costituî il dât util pal ecuilibri demografic.

L'atuâl e pesantissim *deficit* demografic al à cûr di cancelâ la popolazion furlane dal mont al zîr di cualchi gjenerazion e al constituîs un reâl probleme pal aministradôr che nol pues no frontâ cun risoltece.

Ogni vite umane e je preziosissime, a maiôr reson se la sô popolazion e je pôc numerose e riscje la cancelazion, e chest al vâl par ducj chei che a cheste tiere si sintin di apartignî, al di là des propriis origjinis.

Al risulte necessari prime di dut un cambi di mentalitât, sul model di assistance sudtirolese, e la cuistion demografiche e devi tornâ a jessi la vere prioritât fundamentâl pal futûr de nestre comunitât.

Riforme de Edilizie Economiche e Popolâr

Creâ un ent di gjestion de edilizie residenziâl publiche che, sul model sudtirolois:
al risulti efficient, in grât di rispuindi in tims curts ae domande abitative;
al sedi simpri atent ae legalitât, controlant par evitâ e controlâ ogni sache di degrât;
che al ponti ae ricualificazion dal patrimoni edilizi esistent, invezit di produci gnove cimentificazion;
che al tindi a evitâ sorpàs in graduatorie di bande di chei che a fasin domande e che no 'nd varessin vêr drit.

6. - LENGHE E CULTURE

Promozion de identitât furlane (es. lenghe, culture, storie, divulgazion, ancje scolastiche)

Il plurilinguism al costituìs il principâl fundament de stesse specialitât regionâl.

La sô transmission inter-generazionâl e sarâ pussibile dome graciis a une plene autocossience.

Bisugne inviâ une grande operazion culturâl, transversâl e incisive, une vore largje e fuarte, par riunî, tal rispiet des sensibilitâts di ognidune, lis diferentis areis dal Friûl, intune realtât plui solide, unide, politichementri influente, ancje li des istituzions talianis.

Sui infinîts pretescj di division, a devin une volte par dutis prevalê lis resons de unitât furlane.

Il Friûl al devi rispietâ il propri pluralism interni, ma denant a cussî tantis menacis e a cussî grandis sfidis al sarâ une vore plui fuart se al sarâ une volte par dutis unîf.

La culture che si vûl promovi in Friûl a devi jessi avanzade, universâl, identitarie:

AVANZADE, parcè che lis competencis culturâls e operativis dai furlans no devin risultâ secondis a nissun, in Europe e tal Mont, travers il massim sostegn a une libertât di insegnament e aprendiment che al sedi di sigûr meritocratiche sei pai docents sei pai arlêfs;

UNIVERSÂL, parcè che e sedi inclusive di ducj chei che a son a stâ in cheste Region, cence sieradis che a provochedin pôrs e prejudizis, ma tal rispiet des identitâts autoctonis regionâls;

IDENTITARIE, parcè che e promovedi il normâl ûs public de lenghe furlane in ducj i setôrs de vite moderne (cul just rispiet par dutis lis sôs variantis locâls des diversis areis dal Friûl), e ancje des altris lenghis storichis di minorance, secont i fundamentâi principis di efetive paritât di tratament tra ducj i citadins indipendentementri dal grop linguistic che a apartegnin e secont un criteri di almancul tendenzialitât teritoriâl (che al fasedi riferiment ai rispetîfs ambits di tradizional stanziament des rispetivis comunitâts linguisticis autoctonis legalmentri ricognossudis).

Al è tant lavôr ancjemò di fâ ancje tra i rapuarts tra lis variis comunitâts linguisticis autoctonis, che spes si sierin intun isolament cuasi esclusîf o adiriture esclusivist (come che al sucêt ancjemò, almancul in part, in relacion a cualchi, par fortune simpri plui piçui, tocs de minorance slovene, spes triestinis) o ben a son debilissimis e duncje bisugnos di plui atenzion specifiche e plui protezion rinfuarcide (isulis linguisticis gjermanofonis cjargnelis, e in prospettive sapedine, ma ancje comunitât todescje de Valcjanâl).

Acuile dal Friûl e sosten lis liniis programaticis che a son stadis definidis tal Plan Gjenerâl di Politiche Linguistiche pe lenghe furlane 2015-2019 (PGPL). La Agenzie Regionâl pe Lenghe Furlane - ARLeF al larà potenziât e metût in cundizions di puartâ indenant cun podês plens e adeguadis risorsis une incisive politiche di public sostegn necessarie a salvâ e anzit rinfuarcî une lenghe uniche che cumò e côr seri pericol di estinzion.

Al somee urgjente la sensibilizazion dei forescj cun regolâr permès di podê stâ, e soredut dai lôr fîs, no dome ae alfabetizazion in lenghe taliane, ma ancje a un rapuart un pôc lui eculibrât ancje cun dutis lis altris lenghis tradizionâls di chest teritori regionâl.

Cuintri-riforme dal sisteme culturâl regionâl

Combati il gnûf acentrament regionâl, delegant di gnûf la culture a nivel di aree vaste, in maniere di jessi dongje dai citadins. Dâ un tai net ae no logjiche politiche atuâl di volê unificâ dute la region sot al simbul FVG, dulà che a sparissin i idiome locâl e lis particularitâts culturâls par jessi sostituite di une virtûâl e inesistente identitât Friûl Venite juliane. Eliminâ ogni riferiment a cheste improponibile assurditât e sotlineâ simpri plui la presince des dôs identitâts: Friûl – Triest.

Riecuilibri gjenerâl de spese culturâl regionâl (p.e. teatrâl)

Par fâ dome un esempli macroscopic, i Teatris di Triest a risultin di simpri in fuarte pierdite e pûr a son sore finanziâts in maniere esagjerade di bande des cassis regionâls (= in prevalence des tassiss dai contribuents furlans).

Triest e à dome un cuint dai abitants de Region; la spese teatrâl e culturâl de devi jessi proporzionâl rispjet ae popolazion resident tai varis teritoris; la Region e à simpri mancual bêçs e cun Acuile dal Friûl e starà une vore atente a cemût che ju distribuirà.

Nô no sin triestin, ni o intindin diventâlu.

Promozion e valorizazion linguistiche ancje radio-televisive

Esercitâ la influence che un Guvier Regionâl al pues vê su lis struturis dal Servizi Public par pretendi l'immediât ûs de lenghe furlane al interni dal palinsest de programazion regionâl, sul model za in vore in Alt Adis, o amancul tal plen rispjet de leç, risiervant un canâl dedicât ae promozion, ancje in clâf turistiche, de lenghe, de culture, dal savê locâl.

Valorizâ il colegament cui Fogolârs dai furlans tal forest

Riviodi in clâf moderne e funzionâl i colegaments culturâi cui migrants furlans tal forest che a rapresentin il Friûl, oltri che le storie passade e ancje une preziose “ambassade” li dai Paîs dulà che a vivin. Riprogramâ i obietîfs dal Ente Friuli nel Mondo e des diviersis Associazions che a fasin di puint tra il Friûl e i tantissims Fogolârs tal forest, cuntune ativitât di scambis culturâi e di reciproche riscuvierte dai valôrs comuns, soledut identitaris e linguistics, ancje pai zovins.

Predisponi un plan di emergjence di doprâ in situazions di crisi o di grâf pericul tai Paîs dulà che a vivin i nestris emigrants, par dâ lôr mût di rimpatriâ, ancje dome temporaniamenti, o di poni al sigûr i minôrs e i fruts che a rapresentin i sogjets plui vulnerabilis in similis situazions.

O pensin che cheste e sedi une operazion dovude tai lôr confronts ancje in ricognossince a trop che a àn fat te fase dal daspò taramot dal 1976 in aiût aes nestris popolazions colpîdis di chel tragic event.

7 - SCUOLE E UNIVERSITÂT

Sostegn ae scuele publiche midiant la regionalizazion cun atenzion al plurilinguism

Si considere fondamentâl, pe formazion civîl, identitarie, culturâl, professionâl, la valorizazion de scuele *in primis* publiche, che e larès regionalizade secont il model trentin, par jessi strument di formazion (primarie, intermedie, superiôr, sei umanistiche sei sientifiche sei tecniche sei professionâl) di cualitât simpri plui alte.

La pratiche plui avanzade di plurilinguism ancje veicolâr che e unissi insiem e sul stes nivel in ogni setôr e materie sei lis lenghis di minorance sei lis grandis lenghis europeanis a devi jessi principi e metodi educatîf e didatic des scuêlis di ogni ordin e grât in Friûl, oltri a rivêlâsi strument pai plui elevâts valôrs civîl, identitaris, culturâi, professionâi, e cun di plui fatôr di inricjiment uman e ancje di cressite dal nivel culturâl medi di dute la nestre societât.

La plene regionalizazion di dut il sisteme scolastic di ogni ordin e grât, secont il model trentin (insiem al relatîf trasferiment di adeguadis risorsis), al dovaà vignî ben soledade ancje li de Comission Paritetiche Stât - Region, sei a fins di miorament dal servizi (soledut daspò de resinte riforme statale, e etichetade

come “Buine Scuele” ma che si è rivelade falimentâr, par esempi su la gjestion dai docents e lôr sensibilitât educative, sei a fins di efetive tutele scolastiche plene dal plurilinguism regionâl.

No si viôt par quale reson il Stât al podarès neâ a une Region Autonome cuadrilengâl chel che di agns e à concedût a une Provincie Autonome in gran part taliane.

La nestre Region e risulte une vore indaûr su chest front, no dant a nô chel che nus spietarès di dirit: ce varessino di tant diviers i ladins dal Trentin rispjet ai ladins dal Friûl?

In duçj i grâts de scuele, inferiôrs e superiôrs, lis catedris a varessin di vignî assegnadis dome a front de disponibilîtât a risiedi par almancul par cinc agns in Region, e duncje a no demandâ trasferiment in altris bandis, cul supuart di bonus ai insegnants che a adempissin par un intîr cicli.

Sostegn ae Universitât dal Friûl a pat che e mantegni ad implen ai impegnis di leç

La Universitât dal Friûl e devi tornâ al plui prest pussibil tornâ acuvierzi un rûl impuartant tal ambit de alte istruzion, virtuose e autonome, realmentri imparziâl e ad implen fedêl ae mission storiche che e à segnât la stesse istituzion, par volontât populâr (125.000 firmis dai furlans taramotâts) e cun fuartissims leams teritoriâi (il Friûl e otignì la proprie Universitât travers une norme contignude te prime leç statâl organiche di finanziament de ricostruzion daspò-taramot: l'articul 26 de leç 546 dai 8 di Avost dal 1977. La norme e cjatà atuazion ai 6 di Març dal 1978 cun decret dal President de Republiche n. 102, publicât te Gazete Uficiâl n. 102 dai 13 di Avrîl dal 1978. Chel decret al istituì e al de l'inviament di fat de Universitât dai Studis di Udin / Universitât dal Friûl, come istituzion finalizade a «contribuire al progresso civile, sociale e alla nascita economica del Friuli e a divenire organico strumento di sviluppo e di rinnovamento dei filoni originali della cultura, della lingua, delle tradizioni e della storia del Friuli»), al servizi de societât furlane, de alte culture e de cognossince sientifiche e tecniche in ogni setôr e materie, a sostegn de ricercje, in strete colaborazion cu lis aziendis dal teritori, par formâ professioniscj, tecnics, imprenditôrs cualificâts pes impresis furlanis.

La Universitât dal Friûl e devi ativâsi par istituî cors di studi par formâ lis gnovis gjenerazions di insegnants pes scuelis furlanis, cognossidôrs preparâts dal teritori, des sôs potenzialitâts e des sôs Identitâts storichis e culturâls.

Chel che e fasarà pe lenghe furlane no sarà mai suficiente.

Ancje in ambit universitari la Region e dovarà di subit riecuilibrâ la proprie spese universitarie, tignint cont dal fat che la universitât triestine e risulte come al solit sorefinanziade dal Ministeri secont il criteri storic, si ben che la Universitât di Triest e vedi aromai mancun imatricolazions e in prospettive mancun iscrizions rispjet a chê furlane.

Se in Region une Universitât e larà sierade, o ridimensionade, a dovarà jessi chê triestine.

Acuille dal Friûl si impegne a vigjilâ che la colaborazion inter-ateneu no finissi par condizionâ la autonomie didatiche, organizzative, finanziarie de universitât furlane.

Cheste vigjilance no podarà ignorâ il fat che no simpri la Universitât di Udin e à di sigûr e ad implen onorât i impegnis cjapâts cul propri teritori pûr se e à cjapâts impuartants fonts ricevûts di bande regionâl e locâl.

Servizi scolastic stabil pai insegnants des scuelis dal oblic tal intiêr cicli di studi

Garantî la regolaritât e la cualitât dal insegnament scolastic soledut pes scuelis dal oblic, intervignint su la miôr stabilitât dal personâl docent di rûl, par une miôr garanzie di efetîf aprendiment e miôr pussibilitâts di inseriment pai scolârs, stabilizant i docents par un periodi professionâl continuatîf no inferiôr ai 5 agns te struture scolastiche assegnade.

8 - TRASPUARTS E VIABILITÂT

Rinovament de programazion dai traspuarts a nivel regionâl

In Region no esist dome Triest; la gnove linie strategjiche de programazion dal traspuart public locâl e devi cori su la fundamentâl direzion Gurize, Pordenon, Udin, oltri a chê che e puarte a chê altris localitâts che a van dai monts ae maritime e turistiche.

Creazion di une societât regionâl dai traspuarts publics locâi (su gome, aghe, ferade)

Par une miôr gjestion dai traspuarts regionâl e dai colegaments cui paîs forescj, cui coscj plui bas pe utence, tal tentatîf di unî lis ex Provinciis dal Friûl ancje sot di chest profil.

Revision dai standards e dai oraris, tal tentatîf di miorâ il servizi public locâl.

Al risulte necessari favorî in ogni maniere la inovazion e la intermodalitât dal servizi.

Miorament de viabilitât regionâl

Il sisteme de viabilitât, soledut chê dorsâl che e coleghe lis principâls Citâts furlanis, Gurize, Pordenon, Udin, e va rinfuarcide e mantignude eficiente. Ancje cence gnovis oparis, ma metint in sigurece i percors atuâi segnâts, come par esempi la Statâl 13, cuasi simpri al colàs e pont di criticitât sul teritori. Duplicament dal puint sul Midune ae jentrade di Pordenon, che e rapresente un vêr cuel di butilie pal trafic. Metude in sigurece dai pericosis croseris su lis arteriis principâls, come la Pontebane, la Napoleoniche, la "Ferade" Udin – Puart. Preferî interventiis eficacis e economics.

Potenziament de rêta des pistis ciclabilis esistentis

Creazion di gnovis pistis ciclabilis, miorament di chês esistentis, colegaments cun chês di Oltri cunfin e cun chês dal Venet, promozion dai percors e creazion di ponts di informazion culturâl sui sîts traversâts, oltri che des ativitâts ricetivis ancje turisticis che ben a podaressin cressi su chês Cicloviis.

9 - ATIVITÂTS PRODUTIVIS, INDUSTRIE, CUMIERÇ, PLENE OCUPAZION

Creazion di cundizions fiscâls une vore atrativis pai gnûfs insediamentiis aziendâi

Svilupâ e incrementâ la presince di aziendis locâls, cambiant la atuâl situazion di crisi, che e puarte ae sierade di ativitâts o piês al trasferiment tal forest.

Sostegn al redit di imprese

Sostignî soledut dutis lis ativitâts in areis di svantaç economic, impegnantlis a restâ sul teritori che lis sosten e vincolantlis al svilup aziendâl, pussibilmentri inovatîf.

Sostegn ae imprenditorie e ae ocupazion plui debilis, come chês feminîls

Agjevolazion pe imprenditorie feminîl sot forme di finanziamenti a tas zero o font pierdût e/o slizerimenti fiscâi. Incentîfs aes aziendis che a assumin personâl feminîl disocupât sot forme di slizerimenti fiscâi. Dutis lis formis di incentivazion a devin vignî condizionadis al mantigniment de ativitât vierte par almanco 3 agns o de assunzion par almanco 2 agns (il contribût si devi podê otignî dome daspò la verifiche sul efetîf rispiet dai requisîts).

Incentîfs aes zovinis feminis che si iscrivin a cors universitariis, o ancje di scuele superiôr, sot forme di riduzion des tassis universitariis o di bonus sui tescj scolastics. Il bonus libris scolastics al vâl ancje pes scuêls superiôrs, ma dome in câs di profit, e partant la beneficiarie lu riceverà dome in câs di risultât certificât (promozion). Idem par chel che al rivuarde lis tassis universitariis: la beneficiarie e varà un scont su la seconde o tierce rate, ma dome se e varà superât un numar minim mediementri alt dai esams proviodûts dal so cors di studis... e vie indenant.

Finanziament pal recupar dal patrimoni edilizi industriâl dismetût

Sostegn ae conversion dal patrimoni edilizi industriâl in stât di abandon o in disûs, a favôr dal inseriment di piçulis e mediis impresis, soredut se artesanis o familiârs.

Valutazion dal inseriment, dome dulà che al risulti efetivementri necessari, di gnovis zonis a destinazion artesanâl/produtive (limitâ la cimentificazion inutile: no sin in Venit).

Potenziament e svilup des infrastruturis e tecnologjiis di comunicazion tes zonis industriâls/artesanâls esistentis e di gnûf implant.

Favorî une vere integrazion tra il mont dal lavôr e la scuele (ancje universitât)

Facilitâ il passaç de fase teoriche/pratiche des scuêlis superiôrs e de universitât al nivel professionâl dal mont dal lavôr.

Riforme e potenziament de rêta regionâl di formazion professionâl.

Agjevolazion des plui efficientis formis di tirocini e stage.

Finanziament seletif di projets inovatîfs e professionalizâts pe plene ocupazion

Fa incuintrâ domande e ufierte di lavôr finanziant l'incuintri tra i operadôrs economics e cui che al cîr colocament, ancje traviars formis smiradis di formazion professionâl, soredut a sostegn dal reinseriment dai lavoradôrs disocupâts, specie se zovins o di mieze età

Viertidure di *show rooms* li des plui impuartantis capitâls o zonis turisticis forestis

La Regjon, disponint di locâi in locazion, e concedarà sore nuie des veris vetrinis a ducj i produtôrs locâi che a volaran esibî e vendi i propri prodots tal forest.

Contrastâ le viertidure di gnûfs grancj centris comerciâi, a favôr de nassude di gnovis piçulis realtâts locâls "di paîs"

Rilanz des buteghis paisanis e dai piçui negozis ancje a conduzion familiâr par une miôr stabilitât economiche al interni des fameis.

Favorî il svilup e il coordinament dai cuartîrs fieristics furlans

Miôr coordinazion tra i pôi fieristics esistentis in Friûl (es. Udin e Pordenon ma ancje Gurize) par un miôr sincronisim te organizazion dai events vie pe anade.

Valorizazion dal teritori regionâl e furlan in Italie e tal forest

Promozion turistiche di cualitât sei par lis localitâts maritimis sei par chês montanis.

Promozion turistiche par dutis lis Citâts de Regjon in proporzion ae relative popolazion.

Creazion di un Marchi Friûl di promovi in Italie e ancje tal forest, midiant ativitâts Istituzionâls e di Associazionisim Regionâl, coinvolzint ancje lis comunitâts dai nestris Emigrâts.

Riordin des piçulis areis artesanâls e industriâls

Favorî e concludâ cui Comuns coinvolzûts il riordin e il recupar di tantis piçulis areis artesanâls o industriâls sparniçadis sul teritori e no utilizadis, riconvertintlis, daspò di un atent studi, a un utilizi plui proficui pe comunitât locâl tal rispjet dal ambient dulintor.

10 - GJESTION E VALORIZAZION DAI REFUDUMS: TRATAMENT, RICICLI, RIÛS

Il solit probleme dai refudums al va risolt partint de fase di produzion dai stes, o ben si devin poni lis basis par une sostanzial riduzion de lôr imission tes fasis di produzion e distribuzion, viodût che il lôr ricicli e il lôr smaltiment al à bisugne di procès complès e costôs.

Un concet fundamentâl che al risulde necessari al è chel di introdusi soredut te opinion publiche la distinzion tra IMBALAÇS E CONTIGNIDÔRS **RICICLABII** E IMBALAÇS E CONTIGNIDÔRS

RIUTILIZABII: dome chescj ultins a son tant di plui di preferî, e duncje di agevolâ, parcò che no vegnin ni smaltîts ni tornâts a lavorâ daspò di fat il lôr compit originari, cun grant sparagn.

A saran premiadis (cun slizeriments fiscâi) dutis lis ditis e lis ativitâts che a dopraran contignidôrs riutilizabii.

A saran tassâts in maniere adeguate ducj i imblaçs NO riutilizabii ancje se riciclabii.

Refudums plastics

Al risulte indispensabil la riduzion dai imblaçs secundaris e terziaris (utilizâts pe distribuzion e il traspuart des unitâts singulis di vendite dai varis prodots), parcè che si trate di materiâl no riutilizabil, mantignint dome l'imblaç primari in materiâl riciclabil.

Al sarà, duncje, indispensabil la sostituzion dai imblaçs secundaris e terziaris, cun cassetis e pedanis smontabilis e riutilizabilis, e che a varan di fa un percors circolâr che, partint dal puest di produzion, al rivarà fin al consumadôr finâl, par dopo tornâ a indaûr viers il sîl di produzion, dulà, daspò juste netade e sanificazion, e podarà tornâ a jessi doprade in dute sigurece.

Veri

Incentivâ l'ûs massiç dal veri par ducj i licuits e conservis alimentârs, cul mecanisim dal vueit a rindi.

Finîl il so compit, il contignidôr in veri nol ven riciclât (cuntun grandissim cost energjetic) ma riutilizât (daspò juste sanificazion).

Cjarte e carton

Mantignî l'ûs dai imblaçs in cjarte e carton dome te misure indispensabile pe difese dal prodot limitantlu ae sole confezion primarie.

L'imblaç secundari e terziari al vignarà sostituît cun cassetis e contignidôrs plastics riutilizabii.

Nol vignarà vietât l'ûs di plastiche e/o cjarte/carton in nissun mût, ma l'ûs di chescj materiâi come imblaç e contignidôrs non riutilizabii, al sarà tassât in maniere juste, intune vision di fuarte limitazion de jentrade di chescj materiâi te cjadene produtive/distributive.

Frazion organiche refudum solit urban (FORSU)

Il tratament de frazion organiche dai refudums urbans al devi jessi permetût dome cun procès di compostaç "classics", prolungjâts tal timp necessari par rindiju no pericolôs.

Il compostaç al vignarà permetût dome in stabiliments autorizâts e dome pal refudun prodot in Regjon.

L'ûs dal compost otignût, al sarà permetût dome come compost organic in coltivazions no destinadis al ûs alimentâr ni uman ni animâl.

Cicli regionâl di tratament e valorizazion dai refudums; refudums speciâi e altris tipologjiis di refudums

Il cicli di tratament e ricicli dai refudums al sarà fat par intîr in Regjon e dome pai refudums regionâi.

La denominazion "refudum speciâl", che duncje al pues jessi spostât fra lis variis regions, al vignarà valutade di volte in volte, di bande di une comission a pueste di esperts, che e autorizarà il spostament dome in câs ecezionâi, e no di sigûr come prassi, masse spes abusade, aramai cuasi fûr control regionâl.

Bioeconomia

Te otiche di favorî la coltivazion di culturis ancje no destinadis ae alimentazion, si prospete il svilup dal setôr de BIOPLASTICHE, dai BIOPOLIMERIS e des materiis primis pe INDUSTRIE TESSILE a partî de mari vegjetâl o dai sotprodots de industrie alimentâr e enologjiche (trape, scarts de industrie molitorie, bioplastiche dal mais, tiessûts di culturis de fibre).

Il svilup des colturis di fibre e sarà simpri plui impuartante in futûr ancje in considerazion de cressinte richieste di materiâi isolants pe edilizie prodots de lavorazion di chestis plantis.

Simpri tal ambit de bioeconomia, al sarà impuartant favorî il svilup de filiere dal len ancje par fins energjetics, incentivant la produzion di cipât e pellet, a partî sei dai scarts di lavorazion sei di juste coltivazion o ancje smirâts sfrutaments boschîfs, tai limits de sostignibilitât.

11 - SIGURECE

Potenziament dai orghins e des dotazions de polizie locâl

Compatibilmentri cui fonts a disposizion za dedicâts, cu la zonte di une minime part dal belanç di dedicâ, rinfuarcî i organics di polizie municipâl presints sul teritori.

Potenziament dai sistemis automatizâts di tele-video-vigilance a fins di prevenzion dai reâts.

Valorizazion de Forestâl Regionâl

Il model sudtiroloês al va imitât ancje come control dal teritori soledut montan.

Cuarp di Vigilance cun competencis concorintis

Creazion di un cuarp speciâl, formât di elements che za a oparin tes fuarcis di polizie za regionalizadis, cun compits di patuliamet dal teritori, prevenzion, dissuasion dai crimins.

Lis sôs competencis, a flanc des Fuarcis di Polizie dal Stât, a dovaran necessariementri slargjâsi al patuliamet dai confins internis e esternis e al control de imigrazion.

Riecuilibri des percentuâls dai cussì clamâts “dispatriâts” su la popolazion regionâl

Su la cuistion de imigrazion Acuile dal Friûl par documentâsi e consee di lei i pôcs saçs che sul marcjât a tindin a fâ madurî une capacitât critiche rispjet al politichementri coret imperant.

No o crodin che al sedi un ben che il Friûl – Vignesie Julie e ospitedi la plui alte percentuâl di “dispatriâts” su la base de popolazion residente in Region (dome il 5% di chei che a fasin domande di asîl al à i recuisîts par otignî il dirit di asîl e la relative protezion internazionâl).

In particolâr e larès evitade une concentrazion urbane eccessive dificilmentri controlabile; di chê altre bande la volontât dai Comuns e va rispjetade; la uniche soluzion e consist tal domandâ al Guvier centrâl che ancje chês altris Regions a fasedin compagn par sbassâ la pression su la nestre.

Control dal teritori e contrast al ûs dai stupefacentis

Un potenziament dal control dal teritori furlan cul jutori di gnovis tecnologjiis par garantî la pâs sociâl e la sigurece. Une vore impuartant al è il fuart contrast al ûs di sostancis stupefacentis e ae distribuzion, ancje cun azions smiradis di prevenzion tes scuelis e tai diviers ambits de societât.

Concors public regionâl pe assunzion di Agjents Polizie di Stât

La Region Autonome Friûl-Vignesie Julie e pues sostituîsi al Stât centrâl par inmaneâ Concors publics pe assunzion imediade di un numar adeguât di agjents di Polizie di Stât, in numar presumibilmentri di 2000 pal teritori regionâl, al fin di rinfuarcî e integrâ il compart dai agjents za presints sul teritori.

NOTIS FINÂLS E RINGRACIEMENTS

Chest program al è stât realizât graciis ae colaborazion di tantissims furlans, citadins, aministradôrs, sindics, imprenditôrs, personis de culture e politics che a àn contribuît, ognun cu la esperience maduride tal propri setôr, a capî i problemis e a studiâ une pussibile soluzion. O ringraciin di cûr ducj chei che a àn colaborât metintsi a disposizion par realizâ un document di program che al po finalmentri segnâ l’inizi di une svolte in positîf pal nestri Friûl.

Un document che al reste dut câs viert a cualsisei al ritegni di vê des propuestis o des ideis concretis par miorâ il futûr di cheste Region e dai siei abitanti. O ringraciin fin di cumò chei che a volaran puartâ il lôr ulteriôr contribuît. O sarin contents di ricevi i vuestris sugjeriments cu la sperance di metiju in at graciise ae fiducie che i furlans a podaran esprimi cul lôr vôt al nestri e vuestri Moviment pe Autonomie dal Friûl.

Se o condividês chestis propuestis us domandìn di slargjâlis e fâlis cognossi a ducj chei che no àn ricevût chest document, par fa sì che i obietîfs che Acuile dal Friûl – Aquila del Friuli si propon a vantaç di ducj chei che in Friûl a vivin e lavorin, a vegnin cognossûts e condividûts.

Il nestri timôr nol sta tal fat che cualchidun altri al puedi copiâ cualchi part, il che al confermarês la bontât dai contignûts esprimûts, ma pluitost che cui che al à une incjarie tal guvier regionâl, no i tegni cont, ignorant ancjemò une volte lis legjtimis aspirazions de Autonomie dai furlans, une minorance che in realtât e je la maiorance di cheste Regjon.

Al pues jessi che cualchi pont di chest document al sedi comun a altris programs di altris grups politics atuâi o che a sedin esistûts tal passât, chest si spieghe cul fat che di timp lis esigjencis dal Friûl, pûr jessint pe grant part lis stessis, no àn ancjemò cjatât une soluzion.

Un graciis di cûr a dutis lis personis che, in maniere dal dut disinteressade, pal ben dal Friûl, a àn colaborât, in tantis e diviersis manieris, tal furnî lis informazions technichis, tal completâ, tal revisionâ chest nestri e vuestri impuartant document di riferiment programatic gjenerâl. Chest nestri grant lavôr al è a pene scomençât e al è ancjemò viert al vuestri contribût. Soredut o condividìn a scomençâ di cumò cun ducj i furlans di buine volontât parcè che la Primevere dal 2018 e je simpri plui dongje. Graciis a ducj chei che si appassionaran ae cuistion furlane e soredut si impegnaran par risolvile insiem a nô.

President
Segretari
Resp. Identitât furlane (Ref. Friûl orientâl)
Resp. Urbanistiche (Ref. Friûl ocidentâl)
Resp. Culture (Ref. Friûl colinâr)

Luigi Gambellini
Michele Tomasella
Isa Dorigo
Andrea Pasi
Cristian Fior

e a dut il rest dal Diretîf e dai aderents di Acuile dal Friûl - Aquila del Friuli

PRIMEVERE 2018 ELEZIONS REGIONÂLS FRIÛL -V.G.

**SOSTEN ACUILE DAL FRIÛL ... E BASTE UNE FIRME ...AL BASTE
UN VÔT !!!**

web www.acuiledalfriul.org e-mail acuiledalfriul@gmail.com
facebook facebook.com/Acuile-dal-Friul telefon 334.2512084

Acuile dal Friûl - Aquila del Friuli:
il to Moviment candidât aes Elezions Regionâls 2018 ...
cheste volte cambie ... vote furlan !!!

Prime il Friûl, prime i furlans !